

Ini Sa Igsulat Denu Si LUT

Ini Denu Sa Libelu Lut

Na, egoh i Lut nehagtay pelawà, iya sa egoh di medoo sa kelikutan sa tegeIslaél tinulon diyà sa libelu denu sa medoo tegekukum etaw tegeIslaél. Na, beken tegeIslaél Lut i, dodoo bayi tegeMoab polo migsawa diyà sa maama tegeIslaél. Agulé egoh sa sawa di nematay, tapay doo eg-unut-unut Lut i diyà sa nugangan di tegeIslaél owoy tigtu ma egpigtuu diyà si Nemula sa egpigtuuwen sa medoo tegeIslaél. Agulé sinawa di sa sebaen maama duma telahadi sa tapay sawa di, owoy danà da nesesawa, huenan di mebaluy si Lut sa bébê lulud i Dabid sa mapulù datù diyà sa medoo tegeIslaél.

Ini Sa Egoh Da I Ilimélék Mighali Dutu Moab Dò

1 ¹Na, egoh anay egoh sa medoo kaunutan ginelal i Nemula sa egsabà sa tanà Islaél, duen sa bitil dahiya. Huenan di, duen sa sebaen maama tegeBétlihém diyà sa uwang tanà Huda mig-angay da sa sawa di owoy sa duwa anak da maama eg-ugpàugpà diyà sa tanà Moab. ²Na, iya sa ngadan iya wé maama si Ilimélék, owoy sa sawa di si Naomi, owoy si Malon owoy si Kiliyon sa ngadan sa duwa anak da maama. Kagda sa tugod i Ipelaim tegeBétlihém diyà sa uwang tanà Huda. Na, egoh da pelawà dutu Moab dò, ³nematay Ilimélék i, owoy si Naomi daen sa eg-ipat sa duwa anak da maama. ⁴Aglé migsawa sa duwa anak di diyà sa duwa bayi tegeMoab, si Opela owoy si Lut. Agulé egoh di buyu neuma sa kesepulù di gepalay, ⁵nematay ma Malon i owoy si Kiliyon. Hê, si Naomi daen sa nesamà, endà dé duen sawa di owoy endà ma duen anak di.

Ini Sa Egoh I Naomi Owoy Si Lut Migpelikù Dutu Bétlihém Dò

⁶Na, egoh di nelugaylugay, dinineg i Naomi sa egoh i Datù Nemula migtabang sa medoo etaw di danà di migbegay diyà kenagda sa mepion

ketebas da. Huenan di, mig-igkes Naomi i enù ka lumegkà da lapeg sa duwa awas di kedu diyà sa tanà Moab. ⁷Neseunut da eg-ipanaw eglikù dutu tanà Huda dò. Dodoo egoh da diyà dalan, ⁸mig-ikagi Naomi i diyà sa duwa awas di, guwaen di, “Likù yu angay diyà sa kenà sa inay yu. Ungayà ku hiduwan i Datù Nemula kiyu lagà mendaa sa kehidu yu kenak owoy sa kehidu yu sa sawa yu nematay. ⁹Owoy ungayà ku ma pesawaen i Datù Nemula dema kiyu anì dumuen sa kenà yu umugpà sa malayan yu.”

Agulé pinengadekan i Naomi kagda enù ka eg-ebalen di. Dodoo migsinegaw da ¹⁰owoy mig-ikagi da diyà kenagdi, guwaen da, “Meked ké lumikù. Munut ké polo keniko mangay diyà sa kenà sa medoo duma ko.”

¹¹Guwaen i Naomi, “O Okon, mepion amuk lumikù yu polo. Maen di ya meiyap yu umunut kenak? Enù di ya, umanak a pa atu uman anì dumuen dema sa maama umited keniyu? ¹²Likù yu polo, Okon, enù ka lukes a dé owoy endà dé sumawa a dulì. Apiya di pa duen sa ungayà ku sumawa, ataw ka sumawa a igkani sigep anì umanak a maama, ¹³enù di ya, meangatan yu pa atu taman sa egoh di kumedakel? Owoy metigkelan yu pa atu sa egoh yu endà sumawa sa liyu etaw? O Okon, netiigan yu doo endà mebaluy iya wé. Enù ka kinuntelà i Datù Nemula aken, owoy egkedaetan pedu ku ma kiyu danà sa nebaelan yu.”

¹⁴Agulé eggesinegaway da dema. Hê, pinengadekan i Opela sa nugangan di enù ka lumikù dé. Dodoo si Lut, endà miglengà di eg-unut-unut diyà si Naomi. ¹⁵Agulé mig-ikagi Naomi i, guwaen di, “O Lut, lumikù dé sa idos ko diyà sa kenà medoo duma di owoy diyà sa nemula egpigtuuwen di. Mepion amuk umunut ka ma kenagdi lumikù.”

¹⁶Dodoo migsagbi Lut i, guwaen di, “Yaka egsugù kenak pesalid diyà keniko. Munut-unut a polo diyà keniko. Sumalà dé sa angayan ko, iya ma sa angayan ku. Owoy sumalà dé sa kenà ko umugpà, iya ma sa kenà ku umugpà. Owoy sa medoo duma ko, mebaluy kagda ma sa duma ku. Owoy sa Nemula egpigtuuwen ko, mebaluy iya ma sa Nemula pigttuuwen ku. ¹⁷Sumalà dé sa kenà ko mematatay, iya ma sa kenà ku mematatay, owoy sa kenà ku ilebeng. Mepion amuk tigtu mepigtamayan i Datù Nemula aken amuk tumangkà a diyà keniko, liyu daa sa kepatay ta.”

¹⁸Na, egoh i Naomi neketiig sebaen daa sa pedu i Lut umunut-unut diyà kenagdi, endà dé uman di eg-ikagi.

¹⁹Na, eglagbas da eg-ipanaw taman nekeuma da diyà sa menuwa Bétlihém. Egoh da migtebow, negaip sa langun etaw dahiya owoy mig-ikagi sa medoo bayi, guwaen da, “Enù di ya, si Naomi ini i?”

²⁰Migsagbi, guwaen di, “Yoko eg-ikagi ya si Naomi sa ngadan ku, dodoo pengadani yu polo aken si Mala,^a enù ka lagà mepait sa binaelan

^a 1:20 Diyà sa kagi Hibelu, mepion sa selepangan sa ngadan di si Naomi, owoy mepait sa selepangan sa ngadan di si Mala.

i Nemula épê dakel egkegaga diyà kenak. ²¹Egoh ku miglegkang dahini, duen pelà sawa ku owoy medoo anak ku ma owoy sa medoo langun taman ku. Dodoo endà dé duen sa nesamà egoh i Datù Nemula migpelikù kenak dahini. Yoko dé egpengadanan kenak si Naomi enù ka kinuntelà i Datù Nemula épê dakel egkegaga aken owoy pinelihay di ma aken.”

²²Na, iya sa ukit da i Naomi si Lut awas di tegeMoab nekepelikù kedu diyà sa tanà Moab. Egoh da migtebow diyà sa menuwa Bétlihém, iya ma sa egoh sa medoo etaw eg-edung egketu sa sebada.

Ini Sa Egoh I Lut Miggalebek Diyà Sa Hinemulaan I Boos

2 ¹Na si Naomi, duen sa duma di si Boos. Kagdi sa sebaen duma telahadi i Ilimélék sawa i Naomi nematay. Mapulù etaw Boos i owoy kawasà ma. ²Na, mig-ikagi Lut i sa tegeMoab diyà si Naomi, nugangan di, guwaen di, “Pandayà ko aken mangay diyà sa hinemulaan anì umalal a sa bunga sebada diyà sa hinemulaan kenà sa épê di pealal kenak.”

Migsagbi Naomi i, guwaen di, “Na Okon, ipanaw ka dé.”

³Huenan di, mig-angay Lut i diyà sa hinemulaan owoy tinultul di sa inukitan sa medoo tegeketu, owoy kinuwa di sa medoo singgelanggelangay sebada netangtang da. Na, iya sa kenà di nekealal sa hinemulaan i Boos sa duma telahadi i Ilimélék. ⁴Agulé migtebow Boos i kedu diyà sa menuwa Bétlihém, owoy sinaluan di sa medoo tegeketu, guwaen di, “Ungayà ku tulikan i Datù Nemula kiyu.”

Sinagbian da ma, guwaen da, “Ungayà ké metabangan i Datù Nemula kuna.”

⁵Agulé mig-igsà Boos i diyà sa egsugùsuguen di sa kaunutan sa medoo tegeketu, guwaen di, “Ngadan sa malayan siedò kenogon?”

⁶Migsagbi sa kaunutan sa medoo tegeketu, guwaen di, “Kagdi sa bayi tegeMoab mig-unut diyà si Naomi kedu Moab dò. ⁷Migpegeni diyà kenak anì tultulen di sa medoo tegeketu anì alalen di sa medoo sebada netangtang. Eggalebek dahini edung magtu kesimag owoy migdalut daa eghelung diyà sa kemeluman.”

⁸Agulé mig-ikagi Boos i diyà si Lut, guwaen di, “Na, Okon, dinegdineg ko siini ikagiyen ku diyà keniko. Yaka dé eg-angay ya eg-alal diyà sa hinemulaan sa liyu etaw. Dodoo unut-unut ka daa diyà sa medoo bayi tegeketu dahini. ⁹Hahaa ko sa kenà da egketu owoy tultul ko daa sa inukitan da. Sinasà ku ma sa medoo maama eggalebek diyà kenak anì endà bogowen da kuna. Owoy amuk egkelupahan ka, angay ka inem diyà sa medoo buyung pinenù da wayeg.”

¹⁰Agulé miglagkeb Lut i taman neketenà sa kilay di diyà tanà, owoy mig-ikagi diyà si Boos, guwaen di, “Maen di ya egsagipaen ko aken owoy eghiduwan ko ma aken i beken etaw Hudiyu?”

¹¹Migsagbi Boos i, guwaen di, “Dineg ku sa langun binaelan ko diyà sa nugangan ko edung egoh sa sawa ko nematay. Netiigan ku sa egoh ko

migsalid diyà sa emà ko owoy sa inay ko owoy sa tanà kenà ko neetaw, owoy netiigan ku ma sa egoh ko mig-angay dahini anì mugpà ka diyà sa medoo etaw endà nelayaman ko duu egoh anay. ¹² Ungayà ku mebegayan i Datù Nemula kuna untung danà sa mepion binaelan ko, owoy ungayà ku ma tigtu megulub sa untung ko ibegay i Datù Nemula sa egpigtuuwen sa medoo tegeIslaél enù ka kagdi sa inangayan ko egpetabang.”

¹³ Sinagbian i Lut, guwaen di, “O Datù, tigtu mepion sa kebael ko kenak. Pinepion ko sa pedu ku danà sa mepion inikagi ko diyà kenak, apiya di pa beken a lagà sa sebaen bayi diyà sa medoo egsugùsuguen ko.”

¹⁴ Na, egoh di neuma sa ulas da kumaen, mig-ikagi Boos i diyà si Lut, guwaen di, “Angay ka dini, enù ka kumaen ki dé. Kaen ka sa epan, owoy damui ko diyà sa sabaw.” Huenan di, migpenuu Lut i diyà sa dapag sa medoo tegetetu egpenuu, owoy binegayan i Boos ma sa sebada sinelal. Migkaen taman sa egoh di nebesug owoy duen pa sa samà di egkaen. ¹⁵ Agulé egoh i Lut miglegkang dema eg-angay eg-alal sa sebada, mig-ikagi Boos i diyà sa medoo tegegalebek di, guwaen di, “Pandayà yu dé sa kealal di, apiya di pa diyà sa kenà sa medoo inay sebada binegkes. Yoko eghawid duu. ¹⁶ Owoy hugut yu ma sa duma di diyà sa medoo binegkes, owoy tangtang yu anì dumuen sa mealal di. Yoko ma egbulit duu.”

¹⁷ Huenan di, mig-alal Lut i sa sebada diyà sa hinemulaan taman sa egoh di umeled sa agdaw. Agulé egoh di mig-elik dé, nekeuma sakalatà sa nekuwa di sebada. ¹⁸ Inuwit di diyà sa menuwa owoy igpehaa di diyà sa nугangan di sa kedoo nealal di. Igbegay di ma diyà kenagdi sa samà di egkaen. ¹⁹ Agulé inigsaan i Naomi, guwaen di, “Ngadan sa kenà ko mig-alal ini i medoo sebada ini egoh di? Ngadan di etaw épê sa hinemulaan kenà ko mig-alal? Ungayà ku metabangan i Nemula iya wé maama mehidu keniko.”

Aglé tinulon i Lut diyà si Naomi sa kenà di mig-alal, guwaen di, “Iya sa épê sa hinemulaan kenà ku mig-alal si Boos.”

²⁰ Mig-ikagi Naomi i, guwaen di, “Ungayà ku metabangan i Datù Nemula Boos i. Enù ka igpetuu i Datù Nemula doo sa igpasad di diyà sa medoo nehagtay owoy diyà sa medoo nematay.” Owoy guwaen i Naomi ma, “Siedò maama sa duma telahadi ta, huenan di danà sa adat ké, kagdi ma sa sebaen mekeipat kenita.”

²¹ Agulé guwaen i Lut tegeMoab, “Inikagi di ma diyà kenak peumanen di aken petultul diyà sa medoo tegetetu di taman sa egoh da meubus dé kumetu.”

²² Mig-ikagi Naomi i diyà si Lut, guwaen di, “O Okon, mepion amuk tumultul ka daa diyà sa medoo bayi eggalebek diyà sa hinemulaan i Boos, enù ka petow ki daa mebogo ka amuk mangay ka diyà sa liyu épê hinemulaan.” ²³ Na, takà egtultul Lut i diyà sa medoo bayi eggalebek diyà sa hinemulaan i Boos anì alalen di sa medoo egketangtang taman

meubus da kumetu sa sebada owoy teligo ma. Owoy tapay doo eg-ugpà diyà sa kenà sa nugangan di.

Ini Sa Egoh I Boos Migpasad Sa Ketabang Di Si Lut

3 ¹Na, sebaen agdaw mig-ikagi Naomi i diyà si Lut, guwaen di, “O Okon, mepion amuk lagbetan ku kuna sa maama sawaen ko, anì dumuen sa malayan ko kenà ko umugpà. ²Netiigan ko doo neduma telahadi ta Boos i sa ulu-ulu sa medoo bayi duma ko eggalebek. Na, igkani sigep eliken di sa medoo sebada. ³Huenan di, pedigus ka owoy lulowi ko sa lana mepion ngadeg owoy kawali ko sa tigtu mepion ginis ko. Agulé angay ka diyà sa kenà di eg-elik, dodoo yaka pelawà egpehaa ya diyà kenagdi taman endà meubus di kumaen owoy uminem. ⁴Owoy amuk humibat, patikpatik ko sa kenà di. Agulé amuk egtudug dé, angay ko lengih sa kayab diyà sa takem lisen di owoy hibat ka dahiya,^b enù ka iya sa ukit ko egpegeni sa ketabang di keniko. Agulé tulonen di diyà keniko sa baelan ko.”

⁵Migsagbi Lut i, guwaen di, “Baelan ku doo sa langun inikagi ko diyà kenak.” ⁶Aglé mig-angay diyà sa atung kenà da eg-elik owoy eg-unutan di sa igsugù sa nugangan di diyà kenagdi. ⁷Aglé egoh i Boos neubus dé egkaen owoy eg-inem, neanggan dé owoy mig-angay eghibat diyà sa kilidan sa medoo sebada sinetipon da. Egoh di egtudug dé, migpeanag-anag Lut i egpedapag, owoy linengih di sa kayab diyà sa takem lisen i Boos owoy mighibat dé dahiya. ⁸Aglé egoh di buyu teliwadà sigep, petow dé neketikela Boos i owoy migbelikid. Hê, negaip egoh di neketiig duen sa bayi eghibat diyà sa lisenan di. ⁹Mig-igsà, guwaen di, “Ngadan ko i?”

Migsagbi, guwaen di, “O Datù, si Lut a. Na, danà di kuna sa medapag duma telahadi sa sawa ku nematay, mebaluy kuna sa mekeipat kenak. Huenan di, ited ko aken, hih.”^c

¹⁰Mig-ikagi Boos i, guwaen di, “O Okon, ungayà ku metabangan i Datù Nemula kuna. Igpehaa ko uman pa dakel sa kehidu ko sa malayan nugangan ko danà ini i binaelan ko ini egoh diyà sa kedakel kehidu ko igpehaa ko danà sa binaelan ko diyà sa nugangan ko egoh muna, enù ka endà eglagbet ka sa maama batàbatà pa diyà kenak anì sawaen ko, iling ka pubeli ataw ka kawasà. ¹¹Na, o Okon, yaka egkebukul la, enù ka baelan ku doo sa langun pinegeni ko, enù ka netiigan sa langun etaw diyà siini menuwa kuna sa bayi metulanged. ¹²Tuu doo, aken sa medapag

^b 3:4 Iya sa adat da, egbelabag eghibat sa egsugùsuguen etaw diyà sa lisenan sa datù da anì egpegeniyen da sa tabang di. Hediya ma, igdapet da ma sa kayab sa datù da anì metandaan sa keipat di kenagda. ^c 3:9 Diyà sa kagi Hibelu, iya sa kagi di, “Dapeti ko aken sa kayab ko, aken i egsugùsuguen ko.”

duma telahadi sa tapay sawa ko, huenan di danà sa uledin ta meipat ku doo kuna. Dodoo duen sa sebaen ma maama duma telahadi ké uman pa medapag sa keduma di diyà sa tapay sawa ko diyà sa kedapag sa keduma ku kenagdi. ¹³Ugpà ka pelawà dahini siini sigep. Amuk sumimag, hauwen ta amuk kagdi sa umited keniko ataw ka endà. Amuk meiyap, mepion doo iya wé, dodoo amuk endà meiyap di, ipengibet ku danà di melalù Datù Nemula i iteden ku doo kuna. Na, hibat ka dé taman sumimag.”

¹⁴Agulé mighibat dema Lut i diyà sa selatal sa takem lisen i Boos taman sumimag, dodoo mig-enaw egoh di endà pa egtiwaswas sa magtu kesimag anì endà hauwen di sa liyu etaw, enù ka endà egkeiyap Boos i amuk metiigan etaw sa egoh sa bayi mig-angay diyà sa atung kenà di egelik. ¹⁵Mig-ikagi ma Boos i diyà si Lut, guwaen di, “Lengà ko sa kumbung ko owoy bekah ko dini.” Agulé hinudud di sa duwa pulù kakilu sebada, owoy binuligan di ma eghenat. Agulé miglikù Lut i diyà sa menuwa di. ¹⁶Egoh di migtebow, mig-igsà sa nugangan di, guwaen di, “O Okon, enù egoh sa nebaelan ko?”

Agulé tinulon i Lut diyà sa nugangan di sa langun binaelan i Boos diyà kenagdi. ¹⁷Owoy guwaen di ma, “Igbegay di diyà kenak siini medoo sebada, enù ka endà mepion di gaa amuk endà duen sa meuwit ku amuk lumikù a diyà keniko.”

¹⁸Agulé mig-ikagi Naomi i, guwaen di, “O Okon, angati ko taman endà metiigan ko duu sa ketamanan di, enù ka endà umetud Boos i taman endà meubus di duu sa keantang di ini egoh di.”

Ini Sa Egoh I Boos Migsawa Si Lut

4 ¹Na, mig-angay Boos i diyà sa kenà sa medoo ulu-ulu egkesetipon diyà sa bengawan kutà sa menuwa da, owoy migpenuu dahiya. Hê, mig-ukit dahiya siedò duma telahadi i Ilimélék sa maama tinulon i Boos diyà si Lut. Agulé mig-ikagi Boos i diyà kenagdi, guwaen di, “O Akay, angay ka dini owoy penuu ka.” Huenan di, mig-angay ma egpenuu dahiya. ²Agulé sinetipon i Boos sa sepulù ulu-ulu diyà sa menuwa, owoy guwaen di, “Penuu yu ma dini.” Egoh da migpenuu dé, ³mig-ikagi Boos i diyà siedò duma telahadi di, guwaen di, “Na, miglikù dé Naomi i kedu tanà Moab dò, owoy ungayà di dagangen di sa hinemulaan i Ilimélék sa duma telahadi ta. ⁴Iya sa penemdem ku mepion amuk metiigan ko iya wé. Na, amuk meiyapan ko iya wé hinemulaan, beli ko diyà sa taengan siini medoo ulu-ulu diyà sa menuwa ta. Dodoo amuk endà meiyapan ko duu, tulon ko diyà kenak, enù ka kuna sa muna mebaluy meli iya wé hinemulaan, agulé aken sa mebaluy sumetugdug.”

Migsagbì sa maama, guwaen di, “Beliyen ku.”

⁵Agulé mig-ikagi Boos i, guwaen di, “Na, amuk beliyen ko sa hinemulaan diyà si Naomi, mebaluy sawa ko ma si Lut sa bayi balu

tegeMoab, anì umanak sa lagà anak doo sa tapay sawa di nematay owoy mehagdi ma sa hinemulaan sa nematay.”

⁶Migsagbi sa maama, guwaen di, “Amuk hediya, endà mebeli ku duu sa hinemulaan. Enù ka amuk beliyen ku, endà ma mekuwa sa medoo anak ku duu amuk mematay a. Huenan di, kuna dé sa meli, enù ka meked a.”

⁷Na, egoh iya, ini sa adat sa medoo tegeIslaél anì metandaan da sa kedagang da ataw ka amuk sesambiy da sa langun taman da. Eglengaen sa tegedagang sa sebaen bakiyà di diyà sa lisen di owoy ibegay di diyà sa etaw egbeli. Iya sa egbaelan da diyà sa tanà Islaél anì metandaan da neubus dé sa antang da. ⁸Huenan di, egoh sa maama mig-ikagi diyà si Boos, guwaen di, “Kuna dé sa beli,” agulé linengà di sa bakiyà di owoy igbegay di diyà si Boos. ⁹Agulé mig-ikagi Boos i diyà sa medoo ulu-ulu sa menuwa owoy sa langun etaw nesetipon dahiya, guwaen di, “Neketiig yu langun ini egoh di sa egoh ku migbeli diyà si Naomi sa langun taman da i Ilimélék owoy si Kiliyon owoy si Malon, owoy metulon yu ma kani sa hinaa yu. ¹⁰Owoy lagà bineli ku ma si Lut tegeMoab sa nebalu diyà si Malon anì sawaen ku. Huenan di, mebaluy diyà sa malayan i Malon sa langun taman di taman melugay, owoy endà ma mekedan sa ngadan di diyà sa medoo duma telahadi di owoy diyà sa menuwa di ma. Nettiigan yu dé ini i binaelan ku ini egoh di owoy metulon yu ma kani sa hinaa yu.”

¹¹Agulé mig-ikagi sa medoo ulu-ulu sa menuwa owoy sa medoo liyu etaw dahiya, guwaen da, “Hoò, hinaa ké dé sa binaelan yu. Ungayà ké pelagaen i Datù Nemula ini i bayi sawaen ko diyà si Lakél owoy si Liya sa tupù sa medoo tegeIslaél egoh anay. Ungayà ké ma kumawasà ka diyà sa medoo tugod i Épelata owoy lumalag ka ma diyà sa menuwa Bétlihém. ¹²Ungayà ké ma pedoowen i Datù Nemula sa anak ko diyà siini bayi batàbatà pelawà anì adatan da etaw lagà sa medoo tugod i Palés sa anak i Huda owoy si Tamal egoh anay.”

Ini Denu Sa Tugod I Boos

¹³Na, neketuu sa inikagi i Boos, huenan di inuwit di si Lut diyà sa dalesan di anì sawaen di. Egoh da neseuma lawa, tinabangan i Datù Nemula kagdi owoy migkelalingen, agulé mig-anak maama. ¹⁴Huenan di, mig-ikagi sa medoo bayi diyà si Naomi, guwaen da, “Meolò Datù Nemula i. Binegayan di kuna ini egoh di sa bébê ko anì umipat keniko. Ungayà ké lumalag ma diyà sa tanà Islaél. ¹⁵Eghiduan sa awas ko kuna, owoy uman pa mepion sa kebael di keniko diyà sa kebael sa pitu inanak ko maama amuk duen. Mig-anak dé sa awas ko ini egoh anì duen sa bébê ko maama sa egpebagel keniko owoy sa eg-ipat keniko amuk kumelukes ka dé.”

¹⁶Agulé kinuwa i Naomi sa batà owoy sinekepu di owoy eg-ipaten di ma. ¹⁷Pinengadanan sa medoo bayi duma di nasedapag dalesan sa batà

si Obéd, owoy tinulon da diyà sa langun etaw, guwaen da, “Duen dé sa bébê i Naomi maama.”

Na, egoh di nelugaylugay, mig-anak Obéd i si Hési, owoy umanak Hési i si Dabid. ¹⁸Na, ini sa medoo tugod i Palés. Umanak Palés i si Islon. ¹⁹Umanak Islon i si Alam. Umanak Alam i si Abinadab. ²⁰Umanak Abinadab i si Naason. Umanak Naason i si Salmon. ²¹Umanak Salmon i si Boos. Umanak Boos i si Obéd. ²²Umanak Obéd i si Hési. Umanak Hési i si Dabid.